



Cuira, ils 8 da zercladur 2022

Communicaziun a las medias

Restructuraziun da la partiziun da communicaziun

Madlaina Niggli è la nova responsabla per la communicaziun d'interpresa

L'entschatta da zercladur ha la Lia Rumantscha restructurà sia partiziun da communicaziun. Da nov vegn la communicaziun d'interpresa manada sco post da stab attribuì directamain al secretari general Diego Deplazes. A partir dad immediat è Madlaina Niggli responsabla per tut las mesiras da communicaziun da la Lia Rumantscha. Cun in pensum augmentà dad 80% collavura ella plinavant a differents projects da l'organisaziun tetgala per la lingua e cultura rumantscha.

Madlaina Niggli è oriunda da Segl-Maria e sesenta a Tumeigl. Suenter la matura a l'Academia Engiadina a Samedan ha ella studegià scienzas dals meds da massa ed italianistica a l'Universitad da Basilea. Experienceschas professiunalas ha Madlaina Niggli ramassà en il schurnalissem tar la Posta Ladina/Engadiner Post ed en il champ da communicaziun e marketing tar Radiotelevision Svizra Rumantscha. Plinavant ha ella lavurà en l'administraziun federala e chantunala.

Andreas Gabriel, substitut dal secretari general, resta sco enfin uss pledader da medias e persuna da contact per dumondas da las medias e las relaziuns publicas. Nadina Derungs, che ha manà enfin la fin da matg la communicaziun d'interpresa, aveva demissionà sia incumbensa en la communicaziun suenter avair surpiglià ina nova sfida professiunala ordaifer la Lia Rumantscha. Ella resta dentant responsabla en in pensum parzial per las ediziuns da la Lia Rumantscha.